

Vizyon

SNP: Pare pou nenport 'Challenge'

Pandan plizyer semenn serten dimoun tya pe poz keston lo SNP. Zot tya pe dir ki SNP pa en vre lopezisyon e ki depi ki dyalog ti'n komanse ant Mr. Ramkalawan ek Mr. Michel, SNP ti'n perdi son lafors pou keston sa ki gouvènmant i fer e ki nou ti'n les Seselwa tonbe. Sa ti en fo propagann ki ti tous serten nou bann siporter. Ozordi, apre deba lo Leta Lanasyon, tou siporter SNP ek tou lepep Seselwa i konnen ki SNP ek son bann dirizan i solid e pare pou fer fas avek nenport 'Challenge' pou fer avanse nou pei. Tou dimoun i osi konnen ki sel parti politik ki vreman debout lo kote lepep Seselwa dan sa moman difisil e ki pe ofer bann solisyon se SNP.

SNP ki debout pour lepep

Pandan sa deba in osi kler pour lepep Seselwa ki premyerman tou sa ki SNP ti dir pou arive si SPPF i ganny eleksyon in arive. Bokou dimoun ki ti les zot ganny anbete e vot pour SPPF, in dekouver ki mazoritè bann parol ki SPPF ti servi pandan kanpanny ti senpleman bann mwayen pour zot ganny vot, me ki zot ti pe anbet dimoun. Pandan kanpanny, zot ti promet en meyer lavi avek larzan ek komodite bon marse, me la apre eleksyon, sa larzan ki dimoun i gannyen pa ni menm arive le 5, me pli pir, napa komodite e sa ki lo letazer i bokou pli ser ki avan. En SPPF i dekri sa koman en 'vre bat latet fermal'.

SNP 'not for sale'

Tou dimoun in aprezan war kler pour zot menm ki personn pa pou zanmen kapab aste SNP ek son bann dirizan. SNP se en parti politik ki solid e ki koz laverite avek son siporter a tou moman. Me pli enportan ankor,

son siporter i annan sa drwa pour zot koze e kritik parti. Se sa ki fer nou lafors, e pandan sa bann demyen semenn, bann kritik ki siporter in fer in byen ganny apresye par parti, e nou'n ekout tou zot parol. Sa ki ti kwar i kapab aste SNP in dekouver ki 'SNP is not for sale.' Me plito SNP i fer son travay avek en konsyans prop e kler pour lavansman pep Seselwa e devlopman Sesel an-zeneral.

SNP i annan en plan pour Sesel

Pour sak eleksyon, SNP in prezant en plan kler lo ki mannyer i pou travay pou anmenn Sesel pli devan, e donn son pep en meyer lavi. Se sa ki'n permet nou donn Seselwa bann 'warning' lo bann danze ki SPPF tya pe vin avek. Par egzamp, letan nou koz lo lekonomi ek lenvestisman, SNP i anvii donn Seselwa priorite dan sa devlopman afen ki nou pei i ava reste pour Seselwa, me anplis ki sa, larzan ki ganny prodwi i ava reste Sesel. Me pour SPPF, sa i diferan. Zot plito enterese avek lenvestiser etranze, e sa i fer ki nou vann nou

pei avek etranze, e apre letan zot fer zot ta larzan, zot pli enterese tir li Sesel e met en lot pei akoz zot pa vreman enterese avek nou pei. Se pour sa rezon ki SNP ozordi pe dir ki fodre 'Sesel i retourn pour Seselwa!'

SNP ki pou sov Sesel

Partou kot ou pase tou dimoun pe dir ki sel parti politik ki pou kapab remet Sesel an-ord se SNP. SPPF in montre klerman ki zot napa en direksyon, e ki zot prensipalman vol tou lide ki SNP i met devan. E pourtan se sa bann menm SPPF ki ti maltret menm lide SNP lontan. Ozordi zot pran bann lide SNP, zot mal pratik li, e apre zot vire e demann SNP 'oli zot plan?' Seselwa i zis riye avek sa kalite komedi. Me lepep Seselwa i konnen ki zot in fer en gro fot dan demyen eleksyon. Zanmen zot ti ekspekte si sa bann dimoun ki ti dir zot tou keksoz pou ok, e fer tou sa promes, ti pou azir koman bann bouro pour zot. Ozordi se SNP ki pe debout lo kote sa pep e defann zot drwa. Seselwa i kapab kont lo SNP. Ya Papa!

Laverite i ofanse!

Granmoun in tou-l-tan dir ki 'Laverite i ofans son met.' Sa parol lasazes in ganny teste e i kler ki pandan deba lo leta lo nasyon laverite ki SNP in koz lo la in ganny resevwar avek lensilt lo lapar SPPF. Me sa pa'n dekouraz bann MNA SNP pou debout e dir sa ki pe vreman arive dan nou pei. En keksoz i kler: Malgre ki MNA SPPF pa'n aksepte sa laverite, lepep Seselwa ki'n swiv deba lo radyo ek televizyon in aksepte ki fodre annan sanzman e fodre ki laverite i pas premye pour nou pei kapab avanse devan.

I kler ki SPPF i mank kouraz, e ki sa i rezon prensipal akoz nou pa zanmen bouze.

Ki mannyer SPPF i kapab vin dir nou ki koripsyon i zis en 'persepsyon', savedir zis en lide ki dan lespri dimoun, kan tou dimoun i konnen ki sa pei i ranpli avek koripsyon

Problemm avek nou pei ozordi se nou annan serten politisyen ki refize war realite e sa pe met nou pei otaz. Zot refize aksepte realite, alor ki mannyer zot pou kapab fer sa pei avanse devan? Si ou pa aksepte ki ou bato i annan trou ladan, ki mannyer eski ou pou repar li? Fodre aksepte laverite.

Seselwa, se laverite ki pou liber nou. Annou aret kwar zis dan rev, me annou regard laverite e les nou ganny dirize par son lafors. Regard laverite ki otour ou.

Fodre reviz tou lapey

Swivan bann logmantasyon dan lapey lafen pase pour travayer ek bann o-zofisye ki ganny apwente anba Konstitisyon, en deba nasyonnal in leve lo sa size. SNP in fer miting lo Praslin, La Digue ek Mahé pou ekout son bann siporter e pou prezant son pwennvi lo sa size. Keksoz ki'n sorti tre kler se lefe ki dimoun i anvi ki en keksoz i ganny fer pour zot. Tou dimoun pe soufer avek sa pri lavi ki'n ogmante, e letan zot war ki serten i ganny gro logmantasyon, e lezot preski nanryen ditou, byensir zot eksprim zot. Sa i normal e SNP i konpran sa.

Sa ki malere se pandan se lefe ki SPPF pa oule ki sa size i ganny diskite. Mr. Michel in menm dir ki i imoral e pa akseptab pou demande ki gouvènmman i konsider en sirplis mwens afen pou donn travayer en logmantasyon. Sa nou pa dakor avek ditou, e nou seryezman kwar ki gouvènmman i

bezwen rekonsider son pozisyon.

Mr. Ramkalawan in fer bann propozisyon senp devan Lasanble.

1. In demande ki sa revizyon saler par sa eksper Commonwealth i ganny fer deswit e ki travayer i ganny en back-pay depi Zanvyé.

2. In dir ki si Gouvènmman in war li apropiye pou donn gro logmantasyon bann zofisye anba Konstitisyon e koup sirplis

bidze, zot devret fer parey pour travayer ordiner.

Pour lapenn in dir sa, in ganny tou kalite lensilt e menm ganny dir par SPPF, ki si sa larzan i tro bokou pour li, rann. SPPF pa'n fer okenn propozisyon pour travayer, me zot in plito montre ki zot, zot ok. Mr. Decommarmond in menm aksepte ki sa i en sitiasyon kot 'bef dan disab, sakenn vey son lizeye.' Seselwa, gete zot menm.

SPPF i dan konfizyon

Deba lo diskour leta Lanasyon in montre lepep Seselwa vre leta SPPF: Konfizyon, san direksyon e ensolan parey labitid. Plizyer manm in vin dir diferan keksoz ki vreman sokan. Me enn keksoz ki'n pli sokan se ki bokou parmi zot in vin lir en diskour

ekri pour zot par en lot dimoun. O-fet, SPPF in anploy 2 dimoun zis pou ekri zot diskour. Letan ou antann Mrs Gamatis pe fer en sitiasyon dan en san-son Bob Marley, i pa ni konnen ki i pe dir. Sepa si i konn Bob Marley!

Mrs. Gamatis in deklare ki fodre pa ki dimoun i plennyen. Sa ti sok menm SPPF dan Lasanble vi ki ozordi lepep Seselwa pe soufer avek sa pri lavi ki'n ogmante.

Mr. Decommarmond ti osi sok bann SPPF letan i ti dir ki i pa dakor avek sistenn 'Security Clearance'. Pourtan zot a SPPF ti dir nou ki sa i nepli ekziste!

Sa menm Decommarmond ti deklare ki prizonyen fodre ganny peye pour travay ki zot fer dan prizyon afen ki zot ava annan en pti komansman letan zot fini servi zot santans. SPPF ti aplodi li.

Sa ti vreman drol pour nou dan SNP, akoz detrwa lannen pase letan Mr. Ramkalawan ti fer sa propozisyon, SPPF ti ensilt li e dir ki SNP aprezen i oule pey kriminel. SPPF napa lanver ek bon kote!

SPPF pa siport driver pick-up

Pandan ki SNP ti koze dan Lasanble pou siport nou bann driver pick-up Seselwa, tou dimoun in soke pou antann en seri latak dirize par Mr. Wilby Lucas, MNA SPPF pour Baie Lazare e Depite Speaker. Sa imsye pa'n tarde pou atak sa bann dimoun an dizan ki zot zis asize lo sa car park e esper biznes vin kot zot. An dizan sa, in donn sa lenpresyon ki sa bann dimoun se bann parese, e ki zot devret al partou pou rod biznes e aret konplent.

Dan SNP nou war sa latak koman pa akseptab akoz nou'n koz avek sa bann

dimoun e nou konpran zot difikilte. Annou pa oubliye ki letan dibwa i vini, se sanmenm sa bann dimoun ki dormi en lannwit pour ed nou kominote, e se zot menm ki bezwen esper sepa konbyen er-d-tan pou ganny blok ek materyo konstriksiyon. Alor, annou montre respe pour zot.

SNP in demande ki Gouvènmman SPPF i defann lakonpanyen konstriksiyon etranze anmenn driver pick-up etranze, e pour zot sarye materyo dan zot prop transpor. Annou donn manze sa fanmiy Seselwa ki annan loan pou pei e zanfan pou nourri.

Aret Viktimizasyon SBC fodre reformen

Lanons Mr. Michel ki sistenn 'Security Clearance' pou ganny revize in montre dimoun en sel keksoz: Security Clearance i ankor ekziste, e si i bezwen revize, i montre ki dimoun i ankor pe ganny viktimize par en sistenn ki pabon.

Sa deklarasyon i osi montre nou ki in annan en kantite dimoun ki'n soufer anba sa sistenn enzis e pa akseptab. Konbyen zenn ki'n ganny pini pour bann rezon bet? Konbyen lavenir ki'n ganny brize pour rezon politik? E pourtan SPPF ti donn lenpresyon ki zot vreman kontan nou bann zenn.

I osi vreman enkyetan ki Mr. Michel, en

boug ki depi 2004 i prezidan Sesel, e ki'n fer tou sa bann zoli deklarasyon dimyel, pa'n koz laverite avek lepep lo sa size. In servi en sistenn ki'n anmenn soufrans pour Seselwa pou propaz viktimizasyon. E pourtan i ti sipoze diferan avek Mr. René. Seselwa i soke pou dekouver ki i tya pe zis zve bon boug.

SNP pou kontinyen demande ki tou form viktimizasyon i arete dan nou pei. 'Security Clearance' pa devret ganny revize, me aboli kompletman. Retir politik dan lanplwa dan gouvènmman, e nou pei i ava fer progre e nou bann zenn e Seselwa an-zeneral i ava santi ki sa pei ki apel Sesel i osi pour li e ki nou tou nou vreman 'annan par ladan!'

Seselwa i kontinyen konplent lafason ki SBC i travay. SNP in tou-l-tan dir ki i annan keksoz mal dan ladministrasyon sa lorganizasyon e fodre sanzman i arive. Dan Lasanble nou'n dir sa byen for, e parey labitid SPPF in vir parol e donn lenpresyon ki SNP pa siport travayer SBC.

SNP i oule fer kler ki laministrasyon SBC fodre sanze. Sa vye mantalite fodre ale e lespri laliberte ek lekspresyon lib fodre pran rasin. Sa i ava donn bann zournalis e tou travayer SBC sa laliberte pour zot fer zot travay byen, san presyon politik. **SE SA KI SNP PE RODE!**

Nou Pa Pou Zanmen Les Tonbe!